



O vevi cinc agns cuant che mi soi visât che la muart nus rive a ducj. Chel toc di rivelazion al jere rivât slacât tal jet, biel cjalant un libri di pipins. Par il barcon e rivave la ultime luminosità di une sere di Sierade. O soi lât te cucine, mê mari e jere daûr a preparâ di cene.

- Mame parcè la int e mûr?

- E je leç da la vite fi. Dut ce che al nas al rivarà il dî che al mûr.

O ricuardi la rispueste cu l'arome da la cevole taçade.

- Ma, ducj, ducj, ducj o vin di murî?

- Sì, e je cussì, ma a te ti mancje une vore ancjemò, no stâ a pensâ.

- Ma alore infin, finalmentri, jo o varai di crepâ!

- Si, ma ti torni a dî, ti mancje une vore.

- Ma - jo o ai dit , cun lis primis lagrimis saltant sù e i voi cjalantle fis - al finâl ducj a murin!

O soi tornât di corse tal jet, a vaî cul cjâf insot dal cussin.

Al jere passât cualchi minût, e ancjemò vaint o ai sintût la vôs da gno von. Lui al jere a stâ a trê stradis di li e cuasi dutis lis seris al passave par cjase nestre. Lu sintivi ciscâ cun mê mari. Daspò al è vignût a viodimi.

- Mandi. Ce âstu?

- Jo mi soi inacuart che ducj a murin. Mame, tu, jo, e ducj nô e ducj tal mont o passarin a murì.

- Ah sî! Propit cussì - mi dîs une vore tranquil, come se al fevelàsi di chestis robis ducj i dîs.

- Ma parcè o vin di murì? - o domandavi tal mieç di lagrimis e sanglotadis in chel che o o crôt, al è stât il prim ingôs da mê vite.

- Parcè che se la int no murarès, il mont al sarès cussì plen - al à rispuindût fasintmi viodi une man cu lis pontis dai dêts metudis adun - e a no podaressin nancje movisi.

- Ah, sî che je juste! - o ai dit, calmât al moment. E mi soi indurmidît in pàs.

di Zorz Cesaratto

#1069